

Prins Hub : 7 maart '84



orde van ut
aafgebrandj
lingspuëtje

De Kwakel '84

Prins
Hub II

Orde van
ut
Lingspuëtje



Vastelaavendjgezèt : 32^{ste} joargank nummer 1

Beste Moerebuuk en Moerinnekes

As noewe preens zeende is mich auch gevraagd om ein klein stukske te schrieven in de kwakel. Doa wil ich den auch gér gebroek van make. Op de ieste plaats wil ich de road van elf hiel hertelijk danken, vur het in mich gestelde vertroewe en ich zal dit vertroewe auch mét volle inzet proberen waar te make. Zoals de meeste minse al waal zullen weten hubbe ze dit joar eine preens gevraagd oet het Eller volk en neet zoals gewoonlijk eine van de road. Toen ze mich kwoame vroage waas ich in de ieste plaats den auch hiel verrast. Mer toen zag ich tege de vrouw, det vinj ich ein hiel groete ier. Ich hub mich den auch neet lang bedacht en hub joa gezagt. Want as ich det bekiek van ierdere joare, det de Eller minse zoeveul doan om de shjoenste wagen, groep of einling te wére, det is vur mich ein hiel stimulans. Ich weit den auch zeker det mét zoene inzet, de optocht dit jaor weer ein gróet succes zal zeen. Den wil ich nog ein speciaal woord van dank richten tot preens Jo II en prinses Marlies, die vur mich ein gróet vuurbielj zeen gewéestj. As ich het net zo good zal doon as dich Jo, dan weit ich zeker det de carnaval 1984 weer good zal slagen. Tenslotte zou ich wille besloeten mét het motto:

Met Hub van Sjr als regent
is hopelijk eederein kontent.

Prins Hub II

Carnaval ELL 1984

Wanneer de voortekenen niet bedriegen lijkt de vastenavond 1984 een nieuw hoogtepunt te worden in het bestaan van de carnavalsvereniging "de Moerebuuk".

Voor deze opvatting baseer ik mij niet op komende gebeurtenissen, maar op hetgeen wij tot nu in het carnavalsseizoen 1983/1984 hebben mogen beleven.

Een prachtige nieuwe uitrusting van de Raad van Elf, een schitterend geslaagde "boonten avond" en niet op de laatste plaats- zeker niet- de zo voortreffelijk verlopen prinsenproclamatie en installatie (receptie).

Ell weet iets voor elkaar te krijgen, dat wisten wij al.

Dat er tal van organisatie-talenten in deze gemeenschap rondlopen, mocht ik in de afgelopen jaren meer dan eens ervaren.

Daarom doet het mij niet alleen ambtshalve maar ook persoonlijk zo goed, dat de c.v. "de Moerebuuk" in grote eendracht bij voortduring werkt aan een vastenavondviering waar iedereen bij betrokken is.

Laat het zo blijven tot vreugde van de hele Eller bevolking en tot intens vermaak van alle carnavalsgekken in het Moerebuukenriek.

Amuseert Uch.

Alaaf.

De Burgemeester van Hunsel,

Fr. Cortenraad.

Hunsel, februari 1984.

Moërebuuk en Moërebuukskes

Ich hub as aafgetroje prins de ieër òm noch ein lêste weurdje tot uch te richte.
Het waas veur mich ein groêt genoeg òm in 1983 euver het moërelandj te moge regere, zeker om het feit det we deze vasteoavendj as geslaagd kinne numme.

Doa bie wil ich ein dankweurdje richte tot prinses Marlies die mich mèt die daag toch ein geweldjig steun is gewèestj.

Ich wil auch bedanke de Green Stars, die toch steeds weer paraat zeen om de muzikale omlies-ting te verzorge, jonges bedanktj.

Miene opvolger prins Hub II en Prinses Lenie wil ich hiel veul stekdje winse in heur regeringsperiode, mer hie veur verzeuk ich alle moërebuuk en moërinne om heur steun te gève, die ich auch hōb gadj, den weit ich zeker det de vasteloavendj 1984 neet kapot kan. Noe wins ich uch bie deze hiel veul plezeer toe mèt die daag

Alaaf!!!

Prins JO II



Moeërebuuk.

1984 heet veur oos vereeniging inkele verange-
ringe metgebrachtj.

Op de ieëste plaats nateurlik oos noew kos-
tuums, woe wê biezunjer trots op zeen.

The Green Stars, dees geweldjige muzikanten die bie al oos activiteiten de tent op steltje zette, hōbbe ein plaat gemaaktj woevan wê nateurlik hope det ut de ieëste waas oet ein ganse serie tophits.

De derdje verangering zitj um in de Prins.

Hoewaal Jo en neet te vergête Marlies, heur taak in 1983 veurtreffelik hōbbe gedoan, moest de Road in 1984 weer eine angere zeen te vinje, dē alweer bēter moos zeen.

Binne de Road wore gein gooje mieër, aster al oeëts gooje bie hōbbe gezete, en doaroom is be-
slote oom emes boete de Road te vroage.

Noa lang zeuke ister weer eine gevonje en wê mōtte noa al konstatare det de meute neet veur niks is gewaistj.

Bie oos activiteite tot noa toe is al gebleke det Prins Hub II, Prinses Leny en auch Monique en Rob heur kinjer, ut richtige vasteloavendjs-
blood in zich hōbbe.

Doaroom gluif ich det we de Carnavalsdaag in 1984 mèt ein gerūstj hert tegemoet kinne zeen.



Vorst Jan



Alaaf!!!

Ein ritje mét de buurtbus.

Thea van Beurskes (de vrouw van Cor van Bommel) ging ein paar weke trük noa rooj noa 'n vrindin van hûr.

S'murges beldje ze Anny op òm te vroage of det auch gelége kwaam veur s'middigs te kome.

Noa get gezeilverdj en gezaniktj aan de telefoon waas het den geregeldj det Thea mét de buurtbus kwaam, ómdet 't nogal tamelik gries waas inne logt.

Mér noe kwaam veur Thea het probleem pas, want ze haaj nog noëts met de buurtbus gereistj.

Doa haaj Anny lol aan en zeet tegen Thea, doe geis mer noa het kirkplein om ein oor, en asse de bus van Kelpa aaf zuus kome beginse mer te zweije, flink mét die erm inne logt, den wétj de scheffeur detter mótt stoppe.

Joa zeet Thea, den weit ich waal zat, tot straks den, hoje.

En doa waas het mét gezagtj.

S'middes ging Thea al òm kwart veur ein oppet plein aan.

Den bin ich toch zeker neet te laat, dacht ze.

En efkes doa noa kwaam de bus van Kelpa aaf.

Thea begós te zweije wie eine halve gare, mét de erm inne logt.

De scheffeur reej het plein op en stopdje.

Thea rendje noa het buske hêr en toen auch nog wie enne gek aan die deur trékke veur die los te kriege, want det die automatisch ope ging haaj Thea get laat inne gate.

Mér eindelijk waas ze den toch binne en de scheffeur vroeg:

is het de ierste kler det ge met de bus goatj,

Joa zeet Thea, mét de buurtbus teminste waal.

Woordj gé bang det ich uch neet gezeen haaj,

toen snaptje Thea het pas en mét eine roëje kop zeet ze tege de scheffeur, die hubbe mich gezagd det ich det zoa moest doan mer volgens mich hubbe ze mich bie de peút gatj. De cheffeur lachdje en zeet, det dink ich auch. Wachtj mer, dinktj Thea, loat mich daalik mer ins in rooj zeen.

Van heüre zegge.

Vreuger ister in Ell oeët ein vastelaovesgezét gewaestj inne jaore 1903 -1904,

De hoofdpersoeëne in diej gezét wore Klaos litsneet en litsneet klaos.


Waat is noe de beteikenis van "litse" in 't good aod Ell's dialekt.

Oppe ieëste plaats is "litse" ein anger woord veur "bretels", veur de bôks op te haoje.

Ein anger beteikenis is; "oetsjete ôrgens euver". Veur de boetelenjers; oetsjete is ergens over struikelen.

Oetsjete is auch nog "oetgevriedj rake"!!!

Bie dae Klaos litsneet en Litsneet Klaos waas de beteikenis; neet valle ôngerwege, asse mét de vastelaovendj ei stôk in dien hakke haadst. Toendertied waas euveral aerdweeg en dae kost bie j raengelwaer wal ins glaad zeen.



PECH ONDERWEG



Tjeu van de Koalder waas unne aovendj good op stap gewêestj.
S'nachts kwaam hê behuurlik in de stumming, zaat dus trûk, mêr zieëne maag kost neet tegen det gesjômmel toen d'r mêt d'n auto bie hum euver de kezelweeg reej. Hê most stoppe.
Mêr in de gang wie Tjeu doa mêt ziene kop ômlieëg sting, sjoot auch zieën gebit mêt noa boete.
Tjeu haaj niks in de gate, reej noa hoeës en ging doanoa gewuen noa bed hêr.
s'Meurgens sting Tjeu op tieëd op veur zieën werk te doen.
Hê kost neet begriepe hoeë zieën gebit woor gebleve.
Wie d'r einmaal boete kwoam zoog d'r wie de hondj mêt zieën gebit aan ut speule woor.




UT HUNDJE

Bie de Koalder kreges ze ein hundje.
Veur Rika oomdet ze joarig waas.
Doaroom waas ut ein rêkelke.
Ut bleek auch snel det ut eine verrekkeling waas.
Al noa ein paar moandj wister al zuver woe ut ut fijnste waas: mêt de rûk aanne stoof en de puët van zich aaf.
Toevallig zote ze koffie te drinke wie det joonk hundje droumdje en wie detse koos zeen detter eigelik neet zoe joonk mieër waas.
Zeet Loes: Moosse det zeen! Zoeën joonk hundje!
Mam, kan det, det dè noe al luips is?





last van ein verkesköpke?
goatj noa Sjan van Geleuke ziene
verfkroam



GEIN GEVEUL

Ut kumtj tegewoordig nogal ins veur de minse
de tenj loate trekke en ein gebit loate in-
metsele.

Noa zal ederein waal wete det ut efkes doortj
veurdet ze ut geveul in de moondj weer trök
hûbs.

Det euverkwaam eine Eller mins dē in Haalder
woeëntj auch, wie der zich op eine daag rot
haaj gezochtj oomdet der zien branjendje
sigret kwieët waas;
zien joong mooste hum zëgge detter ze inne
mondj haaj.

OPPE SJOEËL GEHUURDJ.

Meister: Weem kan mich ein vloeistof numme diej
neet bevrustj?

Bertus: Kokendj water, meister.

Meister: Woeërôm huulst dich Mieke?

Mieke: ze hōbbe mien bōtramme inne sliék ge-
goeëdj, meister.

Meister: mét opzét?

Mieke: Nae meister, mét huidkieës!!!

Meister zeet Jantje, wae zeen zunjig gewaestj
wanjele aanne knaal en gae raodj noets waat wae
dao zoge;

Waat den, Jantje?

Twieë naakse minse, meister.

Wore het jōnges of maidjes?

Det kosse neet zeen, meister, ze haje niks aan....

Meister: Weem weit weem Beatrix is?

De keuningin meister.

En weem is Juliana? De moder vanne Keuningin....

En weem is Bernhard den? Dae mätte henj inne tés..

Ein Elder maedje ging ins mèt klachte noa
dokter Flot haer.

Waat mankeertj draan? vroeg den dokter,

As ich aanne linkse kantj op miene boêk duuj den

hōb ich pien aanne rechtse kantj in mine rōg,

dokter, zoj doa niks aan te doon zeen???

Dokter; doa is mer ein goj remedie tege en det
is "neet duuje"....

Gehuurdj bie de slachter;

Estebleeftj, veur vief gōlje aafval veurre
hōndj, mer neet te vêt, want de veurige waek
heet Opa doa zien hiële maag mét bedorve.



"DE SMIDSE"



Wisdjer al det :

Langers ziene Hôndj in botsing is gekomme mét
eine Boevjee, en detter daonao slecht mieë
kan loupe.

In Ell minse zeen diej op vekansie goan in
Amerika.

Pestoeër ziene auto het langer oethéltj as de
veurige.

Inne kirk ein tentoeënstelling is gewaest van
waspinkes.

Dit jaor de keuning en de keuningin auch mét
gaon inne optocht in Maasmechele.

Harie dit jaor weer geit asperzjes staeke oppe
Baldersstraot.

Der minse zeen die de boterhammen beware ônger
de roeëtewissers, hê Hub.

Wiel van Niës volgendj jaor in de ton krueptj
en eine buut geit doan.

De Eutjes op de Bonte Aovendj Nel, Toos en
Sof haaje gekloeëtj en bie de nep-eieren ein
paar echte haaje geduutj.

De Road noeëw pekskes heet gekrege en det det
nog mer weinig minse is opgevalle.

Det Stef van Lemme de buutemars nog bêter kan
zinge den de boorekapel ze kan speule.

Wannieër ze auch mer effe vanne koeëj bêst,
ze dich dieën hieël hoeës euverhoup hole.

De Green Stars ein plaat hubbe gemaaktj en
det die plaat veur ederein te koup is.

veur dit en
det anger
noa **JAN** en
MIA



GEZOCHTJ....

NOL + IDIE



Black Beauty

Er woar ins eine mins oet Ell, wê zulle hum veur ut gemaak mêr Harrie numme, dè op eine daag in de gezèt ein hieël sjoeën advertentie loos.

Doa sting in, det er in Tungelder ein Beauty farm zooj wêre geopendj.

En dacht Harrie, doa goan ich zoaterdig op de fiets ins hêr.

Hê wist neet zeker waat ein "Beauty farm" noe precies woar, mer dacht Harrie, ut zal waal get te maken hubbe mêt pèerd.

Det meindje hê zoeë, omdet d'r vreuger op de televisie ein serie kwoam önger de titel "Black Beauty".

Die serie ging euver ein hieël sjoeën zwart pèerd.

Harrie haaj die serie auch gevolgdj en kost zich ut woord "Beauty" nog good herinnere.

Op dè zoaterdig ging Harrie op ziene fiets noa Tungelder.

Einmaal doa aangekomme haaj d'r zien bestèming zoeë gevonje.

Hê ging noa binnen, mer tot zien groeëte verbazing wore er gein pèerd doa.

Waal veul sjiek gekleidje minse, woevan veul vrouwluij opvallendj weinig aan haje.

Euveral sting der meubilair, ut leek in de verste verte neet op eine pèerdstal.

Teleurgestêldj is oos Harrie mêr gegange, en is hê de ieërste de beste kroeg ingedoke.

s'Aovends laat kwoam d'r mêt ein behuurlik stuk in ziene kraag toes.

De pèerd op vandaag zeen neet mieër waat ze gewèestj zeen.

Wisdjer al det:

De vrouw van Lei van Meerester good weit wie det eine akkordijon gekieteldj môt waere.

Waat 't tegeneuvergestêldje is van:
Den Hôndj haaj eine Sjink???

Christ post heet gekrege oet Pole van de moder van ein van diej zengers.

Det hae det auch nog kan laeze auch nog,
(ze sjreef in 't Ingels).

Det Mat van van Glabbeek good kan préke.

Det Hover Sjaak zich good gewindj heet in 't noew hoes.

Haakster Pieër sjoeën dinger maaktj oet hout.
Det de Bussjop det auch al weit....

Pestoeër dit jaor weer gratis Mést kriegtj veur in ziene mooshoof.

Desse dich flink de knieje kônst stoeëte aan die pêulkes oppe stoep bie Linje Sjra.

Det Paul van Pleunis ei sjoeën hoes kriegtj.

Echelste veur eine auto aantrêkke wal ins probleme oplevertj.

De alarminstallaties aanne verkeshökke het good doon op plaatse.

Jan Verstappe gooie asperzes haaj dit jaor.

Meister, wétj gae auch het versjil tüsse
 Oze Lievenhieër enne Paus?
 Nae, Piet, laot ins huuëre???
 Oze Lievenhieër dae is eueveral, meister!!!!
 Enne Paus den, Piet?
 Dae is eueveral al gewaestj, meister.....

Eine echte Ellder Prins dit jaor.

Sönger auch mer gét verkieërdjs te wille zégge
 euer de prinse van de afgeloupe jaore,
 kónne wae dit jaor toch zégge det wae eine
 echte gebore en getoge Ellder prins hóbbe.
 De Gerisse zeen al mieë as tweeëhôngerd joar
 in Ell bekindj en toen op Sinterklaosaovendj
 van 1773 ein Lambert Gerris in Ittervoort
 trouwdje mèt Maria Salemans oet Ell, (Ell waas
 toen parochiej Ittervoort) zulle ze waal noeëts
 gedachtj hóbbe det der ins eine van heur noa-
 kómnelinge den titel van Prins zooj kriege.
 Achtereinvolges trökgekeke is dus Prins Huub
 der eine van Sjr - van Doeër - van Bertus-
 Van Pieëter - van Sjang; allemaol van Zolmes
 aafkómstig.
 De straot woeë det Zolmes ligktj is noe de
 Antoniusstraot vanaaf de jaore 1950-1960.
 Zolmes is afgelédj van Salemans en in 1814
 waas het dao al de Salemanstraot.
 Jaomer det dea naam neet gebleve is.

Wistj der al:

Det Prins Hub II de 1 ste plaat vanne Green-
 Stars heet óntvange, mer he kan ze neürgens
 op dreije.
 Gevraagtj;
 eine tweede hans piccup veur oze prins
 (maag neet kratse).

Wisdj al det:

Det den de sjötterleje van het Dekenaat noa
 Ell kómme. Ze zeen al mèt man en macht bezig
 óm den Daeke van Thoeër ei glaas beer te
 lieëre drinke.

Det de fómfaar het afgelópe jaor good heet
 gespeuldj in Kirkraoj.

Det het gemeindjehoes weer ins verbouwdj is
 en detter noe auch plaats is veur ei raods-
 vergadering te haoje.

Detter nog veul mieëris gebeurtj mer det huur-
 dje waal het volgendj jaor.

-Der al eine militair definitief op zien
 eige nést is trukgekiërdj.

-Det der binnekort nog drie anger heur
 búrgerkleijer weer moge aandoan.






veur ein
pekske op
moat...

Jaw vanne
Sjuuër



verheur en verkaup
van geluidsinstallaties
en toniëlverleechting


Huub van Lunte



goatj der uch
eine stévigé
drinke bie

Tjeu en Mien

As d'r hieëlemaal kepot mot....



NOA
Bèr
Knapen

- in Ell auch gekaartj is veur ein half verke
- van det verke en de twië winnaars ein sjoën foto is gemaaktj
- mét dees foto ein priesvraag kumtj oonger de vraag: waat is ut verke??
- de kal geit det det verke net trök waas van de Franse grens.

- de Vorst de léste tiët nogal ins geknepe weurdj (inne bille)
- hé doa neet vies van is.

- de noewe zaalhoajer nog neet zoe goot kan sjatte wieveul beer in ein vaat zitj det aafgetaptj môt wære
- doaroom daags noa Prinsebal de pöt beer steeds groeëter wore en de middig steeds koajer
- doaroom noe de kal geit det die vanne Road totaal neet kinne zoepe
- det de noewe prins een veurbieëldj heet gegève: 9 flesse beer op oongerhalf oor tiët en den auch zoonger zenuwe kinne spréke.

Wistjer al det:

ze bie ut aanmaken van ein kachel moest beginne met gezette oongerin en neet bovenop te lægge.

De jegers van Indjhoove dik kôntent zeen euver de Ellder ertesop enne "Peejestamp" met broadworst vanne slechter van Ell.
Det ôngerhandj de "Hausmacher" van Harie vanne Slechter in Mestreecht al met smaak gaete weurtj.

Det Briels Ties en Jên nog ins veurrendaag zeen gehoordj dore Heemkundevereiniging.
(Waas det noe ei Kerstverhaal?)

Det bie Christ en Lena weer broeluft is dit jaor.
(ein vaers steit dao al met troane in d'auge op te wachte....)

Oppe vergadering vanne Coveecoo (Limco) knakworste zeen gaete en haardop gekaldj.

Sômmige minse nog good wete detter eine tied waas dette woemes mer ein half oor doordje.
(Detj toen drôkker waas as noew.)

In Kelpe ein parfumfabriek is geslote.

In Wieërt ei wordebook is oetgekômme woë nog eine van Ell aan heet metgewirktj.
Eine kwakkert is in Wieërt eine "Peddemuuëk....)

Dit jaor het ieëste sjôttersfieëst in Ell is oppe 6 dje Meij.



BOTERHAM

Op eine daag leep ich langs de parkeerplaats vanne Muntj.

Hê, doa sting eine veur mich bekindje roëje Renault 4 bestêl.

Echt verwônjerdj waas ich neet, waas het neet det doa ein pekske zaat op ein plaats die vreemdj genûmdj kost wêre.

Tûsse de roetewisser n.l. zaat det lunchpakket van dê bestuurder.

Gezeen de wêrsomstandigheden en det model van de auto, gebroëkdje de cheffeur de auto bliekbaar as broadtromel.

Ich bin nog ins òm de auto geloupe òm te kieke of det der neet "Tuperware" op sting.

Mêr dit waas neet het geval.

Dinkendj: alles is meugelik en Hub in gedachte smakelik ête winsendj bin ich lachendj door geloupe.



BOTSING

Mart en Willie gingen op eine daag eine auto ophoale bie de Vries.

Dê auto kost neet mieër op eigen kracht loupe en most dus gesleiptj wêre.

Mer veur op de auto zoot eine sjoone spoiler en die jong woare bang det det dink besjadigdj kost wêre bie ut versleipe.

Om det te veurkomme, kwoome ze op ut formidabele idee om dê auto aan de trekhoak te versleipe.

Zoeë gezagdj, zoeë gedoan.

Willie in zieëne auto en Mart in de auto dê gesleiptj wêrdje.

Trêkhoak aan trêkhoak trokke ze van de Vries noa Stienen hêr.

Alles leek good te goan, geine plies on gerweges en Mart haaj prakties gein meute de auto achteroet te besteure.

Bienoa toes ging ut toch nog mis.

Lowie van Kessels haaj zieëne vrachtwage bie hum toeës geparkeerdj.


Mart en Willie môste dê auto van Lowie auch veurbie, omdet zoeë snel meugelik de doan, goof Willie ein extra spuit gaas.

Det haaj d'r neet môtte doan, want Mart en de auto woare doa neet op berêkentj.

Hê begost te slingere en waas neet mieër te hoaje. De auto sjoot de wêg euver en kwoam tot stilstandj tege eine dikke baum.

De auto waas rieëp veur de sloop, mêr de "spoiler" aan de veurkantj waas nog aalik en doa ging het toch òm.





DE ROUTE VAN DE OPTOCHT

Opstèlle oppe Kampstroat, via de Busstroat
om 14.00 vètrèkke wè.

Ierst de Sebastiaanstroat, den de Niesstroat
achter de kirkhoof door, richting Meuleveldj,
noa de Brederkamp, de Zwartbrookstroat in de
Meijdoornstroat, de Magnoliastroat, doanao
weer de Niesstraot, dan de Sebastiaanstroat,
en achter de bôndj geit eder ziene kantj.
Wiltj djur de optochtroute vriejhoaje van
auto's,

Oom 8 oor is 't priesoëtreike inne Ellenhof.

Het optochtkomitee.



OETSTEPKE

Mèt heur zèssen woare ze dè daag noa de Rai in Amsterdam gewèestj, Rika waas d'r auch bie.

Ze ginge d'r mèt de trein hêr.

Ut waas eine geweldjige daag gewèestj, ze haaje genote.

s'Aoves ginge ze mèt de trein weer noa hoes.

In Wieërt aangekome, stapden ze oet de trein.

Rika auch, mâr op ut moment det ze det dee, ginge net toevallig de deure van de trein toe.

En jawel, Rika zoot beklemdj tûsse de deuren, ze kost geine kantj mieër oet.


Ze wêrdje paars en blauw, waat ze auch probeerdje, ze zaat harstikke klem tûsse de deure.

Gelukkig waas d'r in de trein eine mins, dè d'r zieëne kop bie heel.

Toen d'r zoog det Rika ut neet al te breid haaj, duudje hê op eine knôp en ginge de deure open.

Mèt eine veur roeje kop kost Rika eindelijk oetstapje.

Ze keek nog noa de trein, alsof ze eder moment det dink van de rails haaj kinne stampe.



haaltj ut oppe BOORE BONDJ

THE GREEN STARS ON 33

(ein sprookje waat waarheid is gewoare)

Doa waas ins in ein klein durpke, gelêge tûsse de knaal en de tungelroyse beek, ein boorekapel. In det zelfdje durpke woëndje auch eine dikke mins, dè bie de road van ellef waas.

Det waas zellefs de dikste mins vanne de hiele road, en det wiltj get zêgge.

Dè mins, dè ging aanne boorekapel vroage of ze gein plaat woeje make.

Vanne opbringst zooje ze den noe pekskes kinne koupe.

De bloazers veuldje doa waal get veur en zoe kwaam êt det ze op 21 januarie vol gooje mood en vol tromme noa de groete stad trochte.

Ze noome de plaat op en noadet ze ein heerlijk hallef hêenke en "ein paar" glaazer beer achter-euver gewirktj haaje, trochte ze vol gooje hoop wêr trûk noa ut durpke.

Ein dink sting vast, de plaat mûs en zooi goud wêre, al mûste ze der 495.000 noa ut stort vaare, mer oppe stort koste ze nateurlik auch niks doon mèt zoeveul plate, want doa haaje ze geine pik-kup.

Doarom beslote de bloazers de plate tog mer hiel te verkoupe en oppe ieste bontje oavendj waas de elpee al drek goud, want doa woore der al viefentwintjig verkocht, namelijk 12 ane road van ellef en 13 aanne kapel zellef.

Dit waas echter gein wônjer want oppe plaat weurdj neet allein gebloaze mer auch gezonge door Heepie en Heepie.

Die gouwe plaat goof de bloazers gooje mood en daarom verspreidje ze de plaat euver ut ganse durp. Euveral kosse de plaat kriege ver ein tiendje, in eine speulgoodwinkel, in alle keffees en bie alle bloazers toes.

As de kapel eûres mûst bloaze nomme ze de plaat mèt en verkochte noch lang en gelukkig.....

Ferke van Linje

Eine tiët geleje gebeurde ut det eine joong
oet ein tamelik groeëte familie oet ELL trouwdje
in Kälpe.

Noa aafloop van die broeloft leet de familie
de joon neteurlik allein mèt zien vrouw en
trok op heives aan oom nog ins lekker door te
zakke.

Roondj half zes laag eindelijk ederein in bed
met veul koffie en angere drank in de maag.

Pap en Mam wore sangerendaags alweer vreug wég
oom de de zaal op te rume: die gève doa nog steeds
ut gooje veurbieeldj.

Roondj kwart op tiën in de mörge sjörök ein van
de logees wakker, want ze haaj get geroke.

Noa waas ze van heure vreendj toch al get ge-
windj mer dè reuk waas toch verdachtj: ut stoonk
noa brandj.

Ut maidje sting op en begos vlot ederein wakker
te make.

Wie hel ut auch sjrieewdje en sjötdje, ut door-
dje tamelik lang veurdet ederein in de gate haaj
waat doa loos waas.

Wie den ieëste wakker waas sjoot dè neteurlik
wie eine duvel noa de telefoon.

Toevallig waas det oze oaje prins JO.

Aanne telefoon!

Jo: Hallo, mèt de brandjweer?

B: Joa!

Jo: Hè, ut brandj hie!

B: Woeë?

Jo: Jè, hie!

B: Woeë hie?

Jo: Jè, hie bie oos!

B: Woeë hie bie oos?

Jo: Jè, hie bie oos inne biekeuke!

B: (oongeduldjig) Joa, mer woeë is bie oos inne
biekeuke?

Jo: (oonröstig) Jè, bie oos aan thoes!

B: (kwoad) Mer welk adres is det den?

Jo: (auch eine roeëje kop) In Ell Kampstroat.

B: Wè kome deraan!

Oongertüsse waas die logee ut hiel hoes door-
gwaistj en haaj ederein mèt veul meut oppe
bein gekrege.

Det haaj nogal get aan want doa loge zoën 15
man te slaope.

Mèt dikke uich wairdje noa ummers gegrepe,
ut ies vanne viever wairdje kepot gehuodj en
ut water oet de viever wairdje euver de in
brandj gevloge ketel gegoeëdj.

Smiddes hübbe ze toen auch gebakke goudvès
gegète.

In ut anger gedeildje van ut hoes waas oonger-
tösse auch mieër lève.

Noe reageertj neteurlik neet ederein utzelfdje
aster huértj det ut hoes in brandj steit, mer
doa waas toen eine mins bie dè sjriktj wakker,
paktj ziene peuk van ut nachtkestje aaf, sjeurtj
zich de pyjama van ut lief, vluugtj noa de kleijer-
kast, goetj twië spiksplintjernoew pek aanne
kantj, grieptj zien kostuum en de mûts vanne
sjötterie en steit 10 seconden later in tenue
en hoajing veur de veurdeur en spriktj den de
volgendje weurd: "Zoë, de sjötterie is tenminste
geredj".

De plisie waas oongerhandj al aangekome.

Wie die manne zoge det ut veur geblustj waas,
begöste ze op slag te regele: "Alle, minse,
gôtj noa hoes toe want hie is toch niks mieër
te belève".

Ze keke gek op heur naas wie ze huërdje det ut
volk allemoal van doa waas en det eigelik mer
de helft thoes waas. De brandjweer waas intösse
auch veur niks aangekome. Omdat de verwûrmingske-
tel opins dus neet wirkdje en tamelik koad waas,
wairdje gevraagdj wie ut hoes verwûrmdj mos wère.

Jo: "Wè hubbe eine allesbranjer!". Eine plisieman:
"det hubbe wè gezeen jao! Gelûkkig veel de sjaai
mèt en kreeg ut hoes nog ein gooj verfbeurt:
alles waat wit waas, is toen op ein half oor
tiët gries gewore.